

Isch wääß noch gudd.....

Isch wääß noch gudd, wie's domols war,
als es Klara noch es Klärsche war.
E sauwa Määde, bescheide unn scheen,
es Beschd vun da Klass is es gewään,
mit gestärkdem Schirzje, zwei longe, peschschwaaze Zebb,
zesamme gebunn mit bunde Schlebb.
So honn isch's in Erinnerung, brav unn lieb.
Ei – es issem jo nix onneres iwwrisch geblieb.

Wenn ma e Tonde hadd, wo Lehring is,
wird ma aach immer druff hingewies,
dass ma e Vorbild sinn muss fa allegar,
weil die Tonde jo so stolz uff ääm war.
Es Klärsche war aach e Vorbild, 's is nitt iwwatrieb,
es war immer aardisch unn immer lieb.

Nur äämol, isch erinner misch noch schwach,
es war wohl im Summa, e aarisch heißer Dach;
die Paus war erum, es hadd geschelld
unn mir honn uns aardisch uffgestellt;
doo heere mir e Stimm, uns all bekannd,
die Frollein Weber, vun uns Lissje genannnd.
Wie hysterisch hadd die gebäard,
ma hadd's uffem gonze Schulhof geheerd:
„Das Kind muss nach Hause, damit die Eltern auch sehen,
was hier auf dem Schulhof so kann geschehen!“
Mir sinn zwei unn zwei erinn marschierd,
hädde gäär gewissd, was dort vorre is passierd.
Erschd in da Klass hann mir gesiehn,
dass es Klärsche fähld. Wo is das donn hin?
Doo rufd so e Schnawwelschniss laud in die Klass:
„Es Klärsche is in de Brunne gefall, es war pitsche nass!“
Uff de Brunnerond ze krawwele war streng unnersahd.
Awwer villeischd hadd das Määde nur Durschd gehadd.
Odda hadd ääner – die Kongurenz war jo schon groß –
e bissje nohgeholf unn 's Klärsche gestoß?
Villeischd hadd's aach nur uffem Rond balongsierd
unn dobei is donn das Ungligg passierd.
Jedenfalls war's kenn aarisch schlimm Sach,
awwer's Wewer Liss hadd e groß draus gemach.
Sei Hinnagedonge war: die evangelisch Uffsischd daucht nix
unn das Klään gridd jetzt dehemm sei Wix.

Das hadd das Lissje awwer aach nur gemennd,
es hadd em Klärsche sei Mamme nitt gekennd.

Kaum honn mir in de Bänk gesitzd,
kummd schun es Klärsche dursch die Dier geflitzd,
gonz drugge unn sauwa, die Sääfebloos is geblastzd
unn dem Lissje war de gonze Spass vapatzd.
Als Kind ma jo monsches nitt vastehd,
was später dursch de Kobb ääm gehd.

Unnarischd hadde mir vun morjens acht bis ään,
monschol war aach nohmiddachs noch Schul gewään.
In demm bissje Freizeid nääwebei
gab's fa uns noch die Turnerei.
Em Klärsche sei Babba war Trainer, e gudder sogaa,
der hädd gäär gehadd, 's wär ihm nohgeschlaa.
Ach, wie war's scheen bei „Frisch, fromm, fröhlich, frei“,
doch zu schnell ware unser Kinnerjohre vorbei.

Mit zwölf geheerd ma nimmeh zu de Klääne.
Jetzt ware mit plötzlich Katschumäne.
Der neie Parrer in Dudwiller, jung unn scheen,
dem sei erschd Klass sinn mir gewään.
Was honn mir geschwärmd fa denne – allegaa,
obwohl er meh fa die vier greeschde Mäade war.
Die hadd de Brauer in sei Herz geschloss gehadd,
zu denn hadd er „meine 4 Säulen“ gesahd.
Streng warer, awwer mir honn vill beim gelehrd;
heit wisse ma, dass war nitt vakehrd.
Noh zwei Johr hadder uns konfermierd
unn in e neier Lebensabschnidd gefiert.
Da Ernschd des Lebens hadd ohngefong
unn jedes is seiner Wäje gong.
Wo das Schicksal se hadd all hinvaschlaa,
das hadd ma oft erschd vill später erfaa.

So is aus em Klärsche es Klara wor,
läbd heit noch in Dudwiller, wo's is gebor,
hadd e nedda Monn, 3 Kinna gudd erzoh,
is schun längschd Oma, zefridde unn froh.